

## Naqqiut

Akissuteqaat 29. oktober 2018-imeersoq taarserpaa  
(Immikkoortut sisamaat allannguuteqarpoq)

**Qanoq ililluta nunatta iluani timersornikkut pitsanngorsaallutalu ineriartortitseqqissinnaanerput pillugu apeqqutaat aallaavigalugu oqallinnissamik siunnersuut? Nunatta nunanut allanut unammisartoqarnerup tungaatigut inerisaajumalluta timersoqatigiiffiit nunatsinni pissartannngorniuttarnerit avataatigut nunatta iluani unammisaqattaartarnerat akulikinnerulersinneqassappat taava qanoq iliuuseqartariaqarpugut?**

(Inatsisartunut ilaasortaq Peter Olsen, Inuit Ataqtigiit)

### Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Naalakkersuisut Inatsisartunut ilaasortaq Peter Olsen, Inuit Ataqtigiit, qujaffigaat apeqquteqaat aallaavigalugu oqallinnissamik siunnersuuteqarnera pillugu.

2018-imi aasakkut nunat Amerikap nunavittaaneersut nunami maani VM-imut anngunniullutik nuannerluinnartumik unammersuaarnerat tamatta eqqaamavarput piffissamilu sivisuumi eqqaamassallugu. Puigunaannerpaat ilagivaat kalaallit assamik arsarlutik nunanut allanut unammisartui Kalaallit Nunaata tamarmi illersormagit qanoq tulluussimaarnartiginersoq. Kikkuugalarattaluunniit tamavitta taamanikkut ataatsimoorpugut.

Timersorneq timimut peqqissunngortitsisarpoq minnerunngitsumillu pitsaasumik inooriaaseqalersitsisarluuni aamma soorlu siunnersuuteqartup oqaatigigaa timersorneq inuttut ajornartorsiuulersinnaanermik pinaveersaartitseqataasinnaavoq. Kalaallit Nunaanni Timersoqatigiit Kattuffiat (GIF) timersornermik timigissarnermillu aaqquussuusaasumik ingerlataqartoq Kalaallit Nunaata nunami pisortatigoortumillu sinniisorisaa timersornermut tunngatillugu Naalakkersuisunut sinniisuuvoq. Naalakkersuisunit pingaartinneqarpoq timersornermi kattuffimmit suleqateqarluarnissaq.

GIF-ip Nunatta Karsianit aamma Tipsernermit Lottornermillu aningaasaliissutinit tapiissutisinerata saniatigut GIF 2017-imi immikkut PANAM2018-ip ingerlanneqarneranut atugassanik aningaasaliiffigitippat kiisalu 2019-imut Aningaasanut Inatsisissatut siunnersuummi 5 mio. kr.-nik timersortarfiit ukiuni tullerni pingasuni nutarterneqarnissaannut atugassanik immikkoortitsillutik.

Tamakkua saniatigut Namminersorlutik Oqartussat Kulturimut aningaasaliissutaannit 1 mio. kr.-t immikkoortinneqarsimapput, timersoqatigiiffiit ammaanersiornernut naggataarnersiornernullu imaluunniit assingusumik aaqquussuussinernut atatillugit eqqumiitsuliortut ilaatigut angalaneranni aningaasartuutigisaannut matussutissatut qinnuteqarfigisinnaasaat.

Naalakkersuisut siunertamut naapertuussorinngilaat timersornermi sammineqartussat qanoq aaqjissuunneqarnissaannut naalakkersuinikkut aalajangiisoqartarnissaa. Akerlianik Naalakkersuisut isumaqarput timersornermi kattuffiit soqutigisaqartullu suleqatigalugit Naalakkersuisut timersornermilu kattuffiit nunami timersortarnermik pitsanngorsaaniarlutik inerisaaniarlutillu qanoq suliniuteqarsinnaanersut pillugu ataavartumik misissuisoqartassasoq.

Timersornermi kattuffiit tassaangillat kisimiillutik nunami timersornerup pitsanngorsaaniissamut inerisaaniissamullu suliaqartussat. Siusissukkut aallartissinnaavugut, assersuutigalugu meeqqerivinniit. Ilulissani meeqqeriveqarpoq timersornermik ukkataqarfiusumik. Inuk meeraaneraniit alliarturnera ilutigalugu timimik aalatitsinissamik soqutiginninnera periarfissaqarnissaalu aqutissiuunneqarsinnaavoq. Assersuutigalugu timersortarfinniinnaanngikkaluartoq piffinni allani, soorlu illoqarfiup iluani avataaniluunniit atortunik pisariitsumik pilersitsinerit. Naalakkersuisut kissaatigaat siunissami sapinngisamik innuttaasut amerlanerpaartaat timiminnik aalatitsinissaq pingaartilissagaat, isumaqarlutillu innuttaasut tamattaalluta tamanna akisussaaffigipput.

Naalakkersuisuniit taamatut oqaaseqarluta inersuarmi soqutiginartumik oqallittoqarnissaa qilanaaraarput.